

Ikon Guru Kebangsaan antara penerima PhD

NST 24.11.2017
LABUAN: Ikon Guru Kebangsaan, Hyginus Lester Junior Lee adalah antara 59 graduan Ijazah Doktor Falsafah (PhD) dalam Majlis Konvokesyen Universiti Malaysia Sabah (UMS) ke-19 tahun 2017.

Beliau adalah dalam kalangan 18 graduan PhD dari Fakulti Psikologi dan Pendidikan (FPP).

Dilahirkan di Kota Kinabalu, Hyginus merupakan Ketua Panitia Bahasa Inggeris SMK Mutiara, Wilayah Persekutuan Labuan dan merupakan Guru Cemerlang Bahasa Inggeris DG44.

Hyginus juga merupakan Jurulatih Utama Kebangsaan (JUK) i-Think dan Jurulatih Utama Kebangsaan (JUK) Bacaan HEBAT sekolah menengah.

Tesis beliau yang bertajuk 'English Language Teachers' Sense of Efficacy, Teaching Effectiveness and Their Practice of Headcount in Students' Academic Achievement in Labuan' (Efikasi, Keberkesanan Pengajaran dan Amalan Headcount Guru Bahasa Inggeris dalam Pencapaian Akademik Pelajar di Labuan) telah dibentangkan dalam beberapa persidangan antarabangsa.

Kajian rintis telah dikongsi dalam Kolokium Pendidikan Pascasiswazah Fakulti Psikologi dan Pendidikan 2014, Labuan International Conference on Educational Research 2016, dan 6th MELTA International Research Conference in English Language Education 2016.

Sebahagian dapatan kajian sebenar pula telah dibentangkan dalam The 2nd International Conference on Religion and Society 2017 (ICRS), 26th MELTA International Conference 2017, dan Labuan International Conference on Educational Research (LICER) 2017. Penulisan kajian beliau telah diterbitkan dalam prosiding ICRS, MELTA dan LICER.

Kajian penyelidikan penuh Hyginus diselia oleh Dr Mohd Khairuddin Abdullah daripada Fakulti Psikologi dan Pendidikan (FPP) Universiti Malaysia Sabah, seorang pensyarah kanan pakar dalam



TAHNIAH... Hyginus bersama Dr Mohd. Khairuddin pada majlis Konvokesyen UMS yang diadakan baru-baru ini.

bidang pengurusan pendidikan.

Komitmen dan kesungguhan dalam bidang penyelidikan telah membolehkan Hyginus memfaktakan pengajian dalam tempoh yang ditetapkan di bawah biasiswa Kementerian Pendidikan Malaysia.

Beliau turut diberi penghormatan menyampaikan ucapan selaku wakil pelajar fakulti beliau dalam Majlis Penghargaan Penyelia dan Pemakaian Jubah Doktor Falsafah Fakulti Psikologi dan Pendidikan pada hari sebelum konvokesyen berlangsung.

Sebelum ini, Hyginus pernah menerima Anugerah Cemerlang Tan Sri Datuk Profesor Emeritus Dr Khoo Kay Kim di atas kecemerlangannya dalam pengajian sarjana pendidikan di salah satu institusi pengajian tinggi awam di Semenanjung Malaysia.

Hyginus mendapat ijazah sarjana muda pendidikan bidang pengajaran bahasa Inggeris dari Victoria University of Wellington, New Zealand dan pengajian asasi dari Institut Perguruan Bahasa-bahasa Antarabangsa (kini IPGM Kampus Bahasa Antarabangsa, Kuala Lumpur).

Sepanjang kerjaya sebagai seorang pendidik, Hyginus telah menerima 46 anugerah peringkat organisasi, negeri, kebangsaan, dan antarabangsa.

Beliau juga telah memben-

tanakan 25 kertas kerja di Malaysia, Filipina, Indonesia, dan Korea Selatan. 4 daripada 6 inovasi pembelajaran beliau telah didaftarkan hakcipta dan satu cap dagangan dengan Perbadanan Harta Intelek Malaysia.

Hyginus telah menerima anugerah ikon guru kebangsaan pada tahun 2015 dalam majlis Hari Guru Peringkat Kebangsaan di Kedah Darul Aman dan ikon guru peringkat negeri Wilayah Persekutuan Labuan pada tahun 2014.

Pada tahun lepas, beliau telah menerima pengiktirafan antarabangsa, Global Citizen Award daripada Ascential plc yang berpusat di London dalam Kemuncak Bett Asia 2017 di Mandarin Oriental Kuala Lumpur.

Jabatan Pendidikan Wilayah Persekutuan Labuan mengiktiraf sumbangan beliau dalam pengajaran dalam Anugerah Tokoh Teladan Pembelajaran Abad ke-21 pada Mac 2017.

Konvokesyen ke-19 UMS menyasarkan 5,313 graduan menerima skrol- 59 daripadanya kedoktoran, 576 sarjana, 4, 632 sarjana muda, dan 46 diploma.

Tan Sri Haji Abdul Ghani Gilong dianugerahkan ijazah doktor falsafah kehormat oleh Tuan Yang Terutama Negeri Sabah, Tun Haji Juhar Datuk Haji Mahiruddin, selaku Canselor UMS. - OLEH JAIN-UDIN DJIMIN